

KANTON SARAJEVO
JAVNA USTANOVA INSTITUT ZA RAZVOJ PREDUNIVERZITETSKOG
OBRAZOVANJA KANTONA SARAJEVO
UPRAVNI ODBOR

PRAVILA
JAVNE USTANOVE
INSTITUT ZA RAZVOJ PREDUNIVERZITETSKOG
OBRAZOVANJA KANTONA SARAJEVO

Sarajevo, mart 2022. godine

Na osnovu člana 27. stav 1. tačka 1., člana 38. Zakona o ustanovama (" Službeni glasnik R BiH " broj:6/92,8/93 i 13/94), člana 8. Odluke o osnivanju Javne ustanove Institut za razvoj preduniverzitetskog obrazovanja Kantona Sarajevo ("Službene novine Kantona Sarajevo", 37/21) i saglasnosti Ministarstva za odgoj i obrazovanje Kantona Sarajevo, broj: 11-05/02-04-10732-1/22 od 15.03.2022. godine, v.d. Upravnog odbora Javne ustanove Institut za razvoj preduniverzitetskog obrazovanja Kantona Sarajevo, na sjednici održanoj 16.03.2022. godine, donosi

PRAVILA JAVNE USTANOVE INSTITUT ZA RAZVOJ PREDUNIVERZITETSKOG OBRAZOVANJA KANTONA SARAJEVO

I OPĆE ODREDBE

Član 1. (Predmet)

Pravila Javne ustanove „Institut za razvoj preduniverzitetskog obrazovanja Kantona Sarajevo“ (u daljem tekstu: Pravila) regulišu naziv i sjedište Javne ustanove Institut za razvoj preduniverzitetskog obrazovanja Kantona Sarajevo (u daljem tekstu: Institut), osnivača, obaveze Instituta prema osnivaču, djelatnost Instituta, način i uvjete obavljanja djelatnosti, odnos prema korisnicima usluga, prava i obaveze, statusne promjene, način raspoređivanja sredstava za rad, imenovanje i razrješenje organa upravljanja, imenovanje i razrješenje direktora, naziv drugih organa Instituta, njihova prava, obaveze, odgovornosti, uvjete i način njihovog izbora i razrješenja, opće akte Instituta i način njihovog donošenja, lica ovlaštena da, pored direktora, zastupaju Institut, njihova ovlaštenja i odgovornosti, način ostvarivanja javnosti rada i druga pitanja utvrđena zakonom i druge odredbe od značaja za rad i za ostvarivanje prava, obaveza i odgovornosti radnika Instituta.

II NAZIV I SJEDIŠTE

Član 2. (Naziv)

- (1) Naziv Javne ustanove je: Javna ustanova Institut za razvoj preduniverzitetskog obrazovanja Kantona Sarajevo.
- (2) Skraćeni naziv Instituta je: JU Institut za razvoj preduniverzitetskog obrazovanja Kantona Sarajevo.

Član 3. (Sjedište)

Sjedište Instituta je u Sarajevu, ulica Aleja Bosne Srebrne bb/IX.

Član 4.

(Promjena sjedišta)

- (1) Javna ustanova može promijeniti naziv i sjedište samo uz saglasnost osnivača, na prijedlog Upravnog odbora Instituta.
- (2) Odluka o promjeni sjedišta i odluka o promjeni naziva Instituta donose se na način utvrđen Zakonom o ustanovama ("Službeni glasnik R BiH" broj: 6/92,8/93 i 13/94), Odlukom o osnivanju Javne ustanove Institut za razvoj preduniverzitetskog obrazovanja Kantona Sarajevo (Službene novine Kantona Sarajevo broj: 37/21) (u daljem tekstu: Odluka) i u skladu sa važećim aktima.

III OSNIVAČ, ODGOVORNOSTI I OBAVEZE PREMA OSNIVAČU

Član 5.

(Osnivač i prava osnivača Instituta)

- (1) Osnivač Instituta je Kanton Sarajevo (u daljem tekstu: Kanton).
- (2) Prava i dužnosti osnivača obavljaće Ministarstvo za odgoj i obrazovanje Kantona Sarajevo (u daljem tekstu: Ministarstvo) i Vlada Kantona Sarajevo (u daljem tekstu: Vlada), u intenzivnoj saradnji sa Ministarstvom za nauku, visoko obrazovanje i mlade Kantona Sarajevo, svako u okviru svojih nadležnosti.

Član 6.

(Odgovornost Instituta prema osnivaču)

Institut je odgovoran osnivaču za rezultate svog rada i djelovanja u svim oblastima za koje je nadležan.

IV OBAVEZE INSTITUTA PREMA OSNIVAČU

Član 7.

(Obaveze Instituta prema osnivaču)

Obaveze Instituta prema osnivaču su da:

- pribavi saglasnost osnivača kod svih statusnih promjena (promjena naziva, sjedišta, djelatnosti i drugih promjena utvrđenih zakonom i Odlukom);
- dostavlja osnivaču Finansijskog plana Instituta u svrhu prosljeđivanja istog prema Vladi i Skupštini Kantona Sarajevo;
- pribavi saglasnost osnivača na Godišnji plan i program rada Instituta;
- dostavi Odluku Upravnog odbora sa Izvještajem o realizaciji Godišnjeg plana i programa rada najkasnije do 15. marta;
- obavještava osnivača o obustavi od izvršenja općeg pravnog akta koji nije u saglasnosti sa Ustavom ili je u suprotnosti sa zakonom ili pojedinačnog akta kojim se nanosi šteta Institutu ili društvenoj zajednici;
- vrši druge obaveze utvrđene zakonom, Odlukom i drugim važećim pravnim propisima.

V DJELATNOST

Član 8.

(Djelatnost Instituta)

- (1) Institut se osniva kao javna ustanova, a u okviru ovlaštenja utvrđenih Zakonom o ustanovama ("Službeni glasnik R BiH" broj: 6/92, 8/93 i 13/94) i Odlukom.
- (2) Aktivnosti Instituta su u funkciji provođenja obrazovne reforme kroz stalno osiguravanje stručnih informacija i pružanje stručne pomoći koje služe kao polazišta organima i institucijama nadležnim za odlučivanje i vođenje obrazovne politike.
- (3) Djelatnosti Instituta su:
 - a) 58.11 Izdavanje knjiga;
 - b) 58.13 Izdavanje novina;
 - c) 58.14 Izdavanje časopisa i periodičnih publikacija;
 - d) 58.19 Ostala izdavačka djelatnost;
 - e) 58.21 Izdavanje računarskih igara;
 - f) 58.29 Izdavanje ostalog softvera;
 - g) 72.19 Ostalo istraživanje i eksperimentalni razvoj u prirodnim, tehničkim i tehnološkim naukama;
 - h) 72.20 Istraživanje i eksperimentalni razvoj u društvenim i humanističkim naukama i
 - i) 74.90 Ostale stručne, znanstvene i tehničke djelatnosti, d. n..

VI NAČIN I UVJETI OBAVLJANJA DJELATNOSTI

Član 9.

(Način i uvjeti obavljanja djelatnosti)

U obavljanju djelatnosti Institut:

- a) učestvuje u provođenju preduniverzitetske obrazovne reforme;
- b) učestvuje u izradi i inoviranju nastavnih planova i programa preduniverzitetskog obrazovnog nivoa; daje stručna mišljenja o nastavnim planovima i programima osnovnog i srednjoškolskog obrazovanja; prati provedbu, vrednuje kvalitet i revidira nastavne planove i programe; utvrđuje i razvija nastavne planove i programe za pojedina područja i predmete; te obavlja i druge poslove u vezi sa nastavnim planovima i programima u skladu sa zakonima;
- c) izrađuje kataloge očekivanih ishoda učenja preduniverzitetskog obrazovanja;
- d) učestvuje u izradi i inoviranju, provođenju i evaluiranju vannastavnih planova i programa s ciljem postizanja cjelovitog razvoja djeteta i učenika;
- e) prati i vrednuje primjenu metoda, oblika i tehnika rada u odgojno-obrazovnom procesu;
- f) vrši provjeru učeničkih postignuća u skladu sa standardima znanja koje propisuje Agencija za predškolsko, osnovno i srednje obrazovanje;
- g) učestvuje u organizaciji i provođenju eksterne mature i drugih oblika eksternih i internih evaluacija odobrenih od strane Ministarstva u skladu sa zakonom te vrši njihovu analizu koju dostavlja Ministarstvu sa prijedlogom mjera za njihovo unapređenje;
- h) izrađuje standarde zanimanja odgajatelja/nastavnika/stručnih saradnika, prati i vrednuje stepen

njihovog dostignuća;

- i) pruža stručnu pomoć, izrađuje kataloge tema i predlaže akreditaciju programa za profesionalni razvoj, kontinuirano organizira i provodi stručno usavršavanje/obuke, te vrši praćenje stručnog usavršavanja odgajatelja/ nastavnika/ stručnih saradnika/ saradnika/ pomoćnika direktora/ direktora u odgojno-obrazovnom procesu i psihosocijalnom razvoju djece i učenika;
- j) učestvuje u pripremi, organizaciji i realizaciji sjednica stručnih aktiva direktora predškolskih ustanova, osnovnih i srednjih škola;
- k) prati, vrednuje i ocjenjuje kvalitet rada odgojno- obrazovnih ustanova, odgajatelja/ nastavnika/ stručnih saradnika i direktora u odgojno-obrazovnom procesu i psiho-socijalnom razvoju učenika;
- l) pruža stručnu podršku odgoju, obrazovanju i rehabilitaciji djece sa teškoćama u razvoju;
- m) učestvuje u izradi, provodi i prati programe izvrsnosti i liderstva učenika;
- n) učestvuje u izradi, provodi i prati programe za djecu iseljeničtva i dijaspore;
- o) organizira i provodi smotre/ takmičenja djece/učenika;
- p) prati, vrednuje i ocjenjuje ispunjenost pedagoških standarda i normativa, te predlaže izmjene istih, učestvuje u razvoju i unaprjeđenju školske infrastrukture;
- r) provodi stručna i naučna istraživanja u odgoju i obrazovanju, predlaže mjere za unapređenje odgojno-obrazovnog rada na osnovu rezultata provedenih istraživanja;
- s) saraduje sa univerzitetima, ustanovama, organizacijama, lokalnom zajednicom i stručnjacima u zemlji i inostranstvu;
- t) obavlja informacijsko-dokumentacijske i izdavačke poslove, prati provedbu udžbeničke politike i daje prijedloge za unaprjeđenje udžbenika i drugih nastavnih materijala, te realizira programe unaprjeđenja udžbenika i nastavnih materijala;
- u) predlaže i prati realizaciju strategija za sve nivoe i oblike obrazovanja do visokog obrazovanja;
- v) pruža stručnu podršku i učestvuje u izradi godišnjeg programa rada odgojno-obrazovnih ustanova;
- z) analizira izvještaj o radu škole na kraju prvog polugodišta i godišnji izvještaj o radu odgojno-obrazovnih ustanova;
- aa) izrađuje analize, uključujući i sekundarnu analizu međunarodnih istraživanja (PISA, TIMSS, PIRLS i slično), priprema izvještaje i na osnovu dobijenih rezultata daje prijedloge mjera za unapređenje odgojno-obrazovnog rada;
- bb) prisustvuje realizaciji nastave, ispita i drugih oblika odgojno-obrazovnog rada;
- cc) učestvuje u izradi ishoda učenja na nastavničkim fakultetima;
- dd) predlaže univerzitetima uvođenje novih programa za nastavničke fakultete i usmjerenja;
- ee) predlaže Ministarstvu i nadležnim organima preduzimanje neophodnih mjera za unaprjeđivanje rada odgojno-obrazovnih ustanova te otklanjanje nepravilnosti i nedostataka i

ff) obavlja i druge poslove u skladu sa Zakonom o ustanovama ("Službeni glasnik R BiH" broj: 6/92,8/93 i 13/94) i Odlukom o osnivanju Javne ustanove Institut za razvoj preduniverzitetskog obrazovanja Kantona Sarajevo ("Službene novine Kantona Sarajevo", 37/21).

Član 10.

(Proširenje ili promjena djelatnosti)

- (1) Institut može proširiti ili promijeniti djelatnost iz člana 8. ovih Pravila o čemu odluku donosi osnivač na prijedlog Upravnog odbora Instituta.
- (2) O statusnim promjenama Instituta odlučuje osnivač.
- (3) U slučaju statusnih promjena: spajanja, pripajanja, podjele ili izdvajanja, imovinskopravni i drugi odnosi utvrđuju se ugovorom.

Član 11.

(Unutrašnja organizacija Instituta)

Poslovi iz djelokruga rada Instituta se organizuju i provode u skladu sa Pravilnikom o radu Instituta.

Član 12.

(Upis u sudski registar)

- (1) Institut se upisuje u sudski registar kod nadležnog suda u Sarajevu.
- (2) Institut ima svojstvo pravnog lica.

Član 13.

(Pečat i štambilj Instituta)

- (1) Institut ima pečat okruglog oblika, promjera 50 mm (veliki pečat) i pečat promjera 30 mm (mali pečat), sa tekstom u koncentričnim krugovima istovremeno ispisanim: "Bosna i Hercegovina, Federacija Bosne i Hercegovine, Kanton Sarajevo ispisan velikim slovima, Javna ustanova Institut za razvoj preduniverzitetskog obrazovanja Kantona Sarajevo - Sarajevo".
- (2) U sredini pečata nalazi se grb Kantona Sarajevo.
- (3) Štambilj Instituta je pravougaonog oblika dimenzija 40 x 70 mm sa ispisanim nazivom javne ustanove, brojem i datumom.
- (4) Druga pitanja koja se odnose na izradu i uništavanje pečata, broj, upotrebu i čuvanje pečata i štambilja Instituta uređuju se Zakonom o pečatu Kantona Sarajevo („Službene novine Kantona Sarajevo", br. 3/09,36/15 i 15/18) i aktima direktora.

Član 14.

(Čuvanje i upotreba pečata i štambilja)

Postupak izrade, način upotrebe, čuvanje i uništavanje pečata reguliše se posebnim općim aktom.

VII ODNOS PREMA KORISNICIMA

Član 15.

(Odnos prema korisnicima usluga)

- (1) Odnos sa korisnicima usluga Instituta uspostavlja se na način i pod uvjetima utvrđenim općim propisima, ugovorima i dobrim poslovnim običajima.

- (2) U obavljanju djelatnosti Institut ne smije uspostavljati nikakva ograničenja niti vršiti diskriminaciju po osnovu teritorijalne, nacionalne, vjerske, političke i bilo koje druge pripadnosti korisnika, a ni u pogledu rase, boje kože, spola, jezika i socijalnog porijekla.

VIII PRAVA I OBAVEZE

Član 16.

(Prava i obaveze)

- (1) Prava i obaveze Instituta prema osnivaču definisana su ovim Pravilima.
(2) Prava i obaveze Instituta koja proizilaze iz radnog odnosa definisana su Pravilnikom o radu Instituta.

IX STATUSNE PROMJENE

Član 17.

(Statusne promjene)

Upravni odbor Instituta može predlagati osnivaču statusne promjene, u skladu sa zakonom, Odlukom i ovim Pravilima.

Član 18.

(Oblici statusnih promjena)

Statusne promjene mogu se odnositi na:

- a) izdvajanje dijela Instituta u samostalnu ustanovu, odnosno drugi organizacioni oblik organizovanosti utvrđen zakonom,
- b) spajanje Instituta sa drugom ustanovom, odnosno drugom odgovarajućom organizacijom,
- c) pripajanje Institutu druge ustanove, odnosno druge odgovarajuće organizacije, podjelu ove javne ustanove na više ustanova, odnosno više drugih oblika organizovanosti utvrđenih zakonom.

Član 19.

(Preuzimanje prava i obaveza i odgovornosti za obaveze)

Preuzimanje prava, obaveza i odgovornosti za obaveze u slučaju statusnih promjena Instituta reguliše se na način utvrđen zakonom.

Član 20.

(Prestanak rada Instituta)

Institut prestaje sa radom:

- a) odlukom osnivača,
- b) ako ne ispunjava propisane uvjete za obavljanje djelatnosti propisane Odlukom i ovim Pravilima,
- c) ako više ne postoji potreba ili uvjeti za obavljanje osnovne djelatnosti,
- d) ako mu je izrečena mjera zabrane obavljanja djelatnosti,
- e) ako se pravosnažnom odlukom suda utvrdi ništavost upisa u sudski registar,

- f) ako je u nemogućnosti da ispunjava propisane obaveze, a Odlukom nije utvrđena odgovornost osnivača za te obaveze,
- g) ako se pripoji drugoj ustanovi ili podijeli na dvije ustanove i
- h) u drugim slučajevima previđenim zakonom i drugim propisima.

X NAČIN RASPOREĐIVANJA SREDSTAVA ZA RAD

Član 21.

(Obezbjeđivanje sredstava za rad)

- (1) Sredstva za rad Instituta obezbjeđuju se iz Budžeta Kantona Sarajevo.
- (2) Osnivač je obavezan osigurati sredstva za:
 - a) plaće i naknade;
 - b) materijalne troškove za obavljanje djelatnosti iz člana 9. Odluke;
 - c) stručno usavršavanje i obuku radnika;
 - d) tekuće i investiciono održavanje objekata i opreme i
 - e) ostale programske aktivnosti Instituta.

Član 22.

(Sticanje prihoda)

- (1) Pored sredstava koja osigurava osnivač iz člana 21. stav (2) prethodnog člana, Institut može obavljati komercijalnu djelatnost i stjecati vlastite prihode pod uvjetom da ne ugrozi osnovnu registriranu djelatnost i to iz:
 - a) tekućih transfera drugih nivoa vlasti i međunarodnih organizacija;
 - b) donacijom pravnih i fizičkih lica, legata, zavještanja;
 - c) izdavačke djelatnosti i
 - d) drugih izvora u skladu sa zakonom.
- (2) Prihodi iz stava (1) ovog člana uplaćuju se na jedinstveni račun Budžeta Kantona Sarajevo u skladu sa propisom koji reguliše navedenu oblast.

Član 23.

(Finansijski plan)

- (1) Sredstva Instituta i njihov raspored za pojedine namjene utvrđuju se Finansijskim planom Instituta, kojeg za svaku poslovnu godinu, na prijedlog direktora usvaja Upravni odbor i putem Ministarstva dostavlja Vladi i Skupštini Kantona Sarajevo.
- (2) Konačan Finansijski plan Instituta donosi se u skladu sa odredbama zakona koji regulišu ovu oblast.
- (3) Pored godišnjeg Finansijskog plana, Institut je obavezan da donosi i kvartalne finansijske planove.
- (4) Upravni odbor može u toku godine, na prijedlog direktora, u cilju uravnoteženja finansijskog plana vršiti izmjene, odnosno dopune, ako se sredstva Instituta ostvaruju u manjem odnosno većem iznosu od planiranog.
- (5) Izmjene i dopune vrše se na način i po postupku predviđenom za njegovo donošenje. Ne smatraju se izmjenama i dopunama u smislu ovih Pravila one izmjene i dopune koje se odnose

na usklađivanje Finansijskog plana Instituta sa zakonom i drugim propisima i mjerama, kao i odlukama nadležnih državnih organa i organa iz čijih se izvora Institut finansira.

- (6) U skladu sa zakonom po isteku svake poslovne godine, godišnjim obračunom utvrđuje se bilans poslovanja na obrascima godišnjeg izvještaja Instituta. Na prijedlog direktora, Upravni odbor usvaja godišnji obračun za svaku proteklu godinu.

Član 24.

(Poslovanje Instituta)

Institut posluje u skladu sa odredbama zakona i podzakonskih akata kojim se uređuje trezorsko poslovanje, budžet, izvršavanje Budžeta Kantona Sarajevo, i odredbama drugih zakona i propisa kojima se uređuje djelatnost i poslovanje javnih ustanova.

XI ORGAN UPRAVLJANJA

Član 25.

(Upravni odbor)

- (1) Organ upravljanja u Institutu je Upravni odbor, koji broji pet članova, od čega je: jedan predstavnik iz reda radnika Instituta, tri člana, od kojih je jedan predsjednik Upravnog odbora koja predlaže Ministarstvo za odgoj i obrazovanje Kantona Sarajevo (u daljem tekstu: Ministarstvo) i jedan član kojeg predlaže Ministarstvo za nauku, visoko obrazovanje i mlade Kantona Sarajevo.
- (2) Članove Upravnog odbora u skladu sa Zakonom o ministarskim, vladinim i drugim imenovanjima („Službene novine Federacije BiH”, br. 12/03, 34/03 i 65/13), nakon provedene procedure javnog oglašavanja, imenuje i razrješava Vlada Kantona Sarajevo, na prijedlog Ministarstva.
- (3) Mandat članova Upravnog odbora je četiri godine s mogućnošću jednog reizbora, a mandat člana teče od dana konstituisanja Upravnog odbora.
- (4) U slučaju kada Upravni odbor nije imenovan, Vlada imenuje vršiöce dužnosti predsjednika i članova Upravnog odbora u skladu sa zakonom.
- (5) Na odluku Vlade iz stava (2) i (4) ovog člana, nije dopuštena žalba, ali se može pokrenuti upravni spor u roku od 30 dana od dana dostavljanja odluke.

Član 26.

(Nadležnost Upravnog odbora)

- (1) Upravni odbor je nadležan za:

- a) donošenje Pravila, Pravilnika o radu i drugih općih akata u skladu sa zakonom;
- b) utvrđivanje Godišnjeg plana i programa rada;
- c) imenovanje i razrješavanje dužnosti direktora;
- d) donošenje odluke o raspisivanju konkursa za prijem radnika;
- e) donošenje Finansijskog plana i usvajanje Godišnjeg obračuna;
- f) odlučivanje o korištenju sredstava preko iznosa utvrđenog Pravilima i zakonom;
- g) donošenje Plana javnih nabavki;
- h) usvajanje Izvještaja o radu i finansijskom poslovanju;
- i) odlučivanje o promjeni unutrašnje organizacije;

- j) predlaganje osnivaču promjene djelatnosti i statusnih promjena;
 - k) odlučivanje o svim pitanjima obavljanja djelatnosti radi kojih Institut osnovan, ako zakonom nije regulisano da o određenim pitanjima odlučuje neko drugi;
 - l) rješavanje svih pitanja odnosa sa osnivačem;
 - m) odlučivanje o prigovoru radnika na rješenje kojim je drugi organ Instituta određen Pravilima odlučio o pravu, obavezi i odgovornosti radnika iz radnog odnosa i
 - n) druga pitanja u skladu sa zakonom i Pravilima.
- (2) Pitanja prava, obaveze i odgovornosti Upravnog odbora definisana su Odlukom, a pitanja o postupku, kriterijumima za izbor i imenovanje, razlozima i procedurama za razrješenje i suspenziju Upravnog i Nadzornog odbora definisani su Odlukom o postupku, kriterijumima za izbor i imenovanje, razlozima i procedurama za razrješenje i suspenziju Upravnog odbora, Nadzornog odbora i direktora Javne ustanove Institut za razvoj preduniverzitetskog obrazovanja Kantona Sarajevo (Službene novine Kantona Sarajevo, broj: 45/21).
- (3) Upravni odbor odluke donosi većinom glasova svih članova, ako zakonom za odlučivanje o pojedinim pitanjima, nije određena druga kvalifikovana većina.

XII ORGAN KONTROLE POSLOVANJA

Član 27.

(Nadzorni odbor)

- (1) Organ kontrole poslovanja Instituta je Nadzorni odbor.
- (2) Nadzorni odbor broji tri člana čijeg predsjednika i članove imenuje i razrješava Vlada u skladu sa Zakonom o ministarskim, vladinim i drugim imenovanjima.
- (3) Jedan član Nadzornog odbora imenuje se iz reda stručnih radnika zaposlenih u Institutu, jedan član kojeg predlaže Ministarstvo i jedan član kojeg predlaže Ministarstvo za nauku, visoko obrazovanje i mlade Kantona Sarajevo.
- (4) Članove Nadzornog odbora, nakon provedene procedure javnog oglašavanja upražnjenih pozicija imenuje i razrješava Vlada, na prijedlog Ministarstva.
- (5) Mandat članova Nadzornog odbora je četiri godine.
- (6) Nadzorni odbor:
 - a) analizira izvještaj o poslovanju Instituta;
 - b) u obavljanju nadzora nad upotrebom sredstava za rad, pregleda Godišnji izvještaj o poslovanju i godišnji obračun;
 - c) pregleda i provjerava urednost i zakonitost vođenja poslovnih knjiga i izvještava osnivača, Upravni odbor i direktora o rezultatima nadzora.
- (7) U slučaju kada Nadzorni odbor nije imenovan, Vlada imenuje vršioca dužnosti predsjednika i članova Nadzornog odbora u skladu sa zakonom.
- (8) Na odluku Vlade iz stava (2) i (4) nije dopuštena žalba, ali se može pokrenuti upravni spor u roku od 30 dana od dana dostavljanja odluke.
- (9) Pitanja prava, obaveze i odgovornosti Nadzornog odbora definisana su Odlukom o osnivanju Javne ustanove Institut za razvoj preduniverzitetskog obrazovanja Kantona Sarajevo ("Službene novine Kantona Sarajevo", 37/21), a pitanja o postupku, kriterijumima za izbor i imenovanje, razlozima i procedurama za razrješenje i suspenziju Upravnog i Nadzornog

odbora definisani su Odlukom o postupku, kriterijumima za izbor i imenovanje, razlozima i procedurama za razrješenje i suspenziju Upravnog odbora, Nadzornog odbora i direktora Javne ustanove Institut za razvoj preduniverzitetskog obrazovanja Kantona Sarajevo (Službene novine Kantona Sarajevo, broj: 45/21).

XIII IMENOVANJE I RAZRJEŠENJE DIREKTORA

Član 28.

(Izbor, imenovanje i razrješenja direktora Instituta)

Opći i posebni uslovi za izbor i imenovanje direktora Instituta, postupak izbora, imenovanja i mandat direktora, javni oglas i postupak izbora direktora, prava i obaveze članova Komisije za izbor direktora, suspenzija i prijevremeno razrješenje direktora, institut vršioca dužnosti direktora, način njegovog imenovanja, kao i ostale odredbe koja se tiču imenovanja i razrješenja direktora, definisana su Odlukom o postupku, kriterijumima za izbor i imenovanje, razlozima i procedurama za razrješenje i suspenziju Upravnog odbora, Nadzornog odbora i direktora Javne ustanove Institut za razvoj preduniverzitetskog obrazovanja Kantona Sarajevo (Službene novine Kantona Sarajevo, broj: 45/21).

XIV STRUČNO VIJEĆE

Član 29.

(Stručno vijeće Instituta)

Institut ima Stručno vijeće, čija prava, obaveze i odgovornosti, sastav i način rada su definisana članom 25. Odluke o osnivanju Javne ustanove Institut za razvoj preduniverzitetskog obrazovanja Kantona Sarajevo ("Službene novine Kantona Sarajevo", 37/21).

XV OPĆI AKTI INSTITUTA I NAČIN NJIHOVOG DONOŠENJA

Član 30.

(Donošenje općih akata)

- (1) Osnovni opći akt Instituta su Pravila Instituta.
- (2) U skladu sa Zakonom, Pravilima Instituta, i drugim važećim propisima, Upravni odbor donosi i druga opća akta kojima se regulišu pitanja vezana za rad Instituta, njegovo poslovanje, prava i odgovornosti radnika, odnosi sa saradnicima, unutrašnja organizacija i sistematizacija poslova i radnih zadataka i drugo.
- (3) Sva opća akta donosi Upravni odbor Instituta, većinom glasova, a na prijedlog direktora.
- (4) Inicijativu za donošenje, izmjene i dopune općih akata mogu dati: osnivač, organi i radnici Instituta.
- (5) Izmjene i dopune općih akata vrše se na način na koji se i donose.

Član 31.

Postupak donošenja Pravila

- (1) Upravni odbor Instituta, nakon utvrđivanja nacerta Pravila dostavlja ih na saglasnost Ministarstvu.
- (2) Upravni odbor Instituta donosi Pravila, nakon dobijene saglasnosti Ministarstva.
- (3) Pravila Instituta stupaju na snagu danom donošenja Pravila od strane Upravnog odbora Instituta.
- (4) Opći akti Instituta objavljuju se na web stranici Instituta, a u nedostatku iste, objavljuju se na oglasnoj ploči Instituta.

Član 32.

(Primjena i autentično tumačenje)

- (1) Odredbe ovih Pravila primjenjuju se onako kako su utvrđene, a u slučaju potrebe autentično tumačenje Pravila kao i drugih općih akata Instituta, daje Upravni odbor Instituta, uz prethodno pribavljeno mišljenje Ministarstva.
- (2) Odluka o autentičnom tumačenju objavljuje se na oglasnoj tabli Instituta.

Član 33.

(Opći akti Instituta)

Pored zakonom utvrđenih akata Institut ima i slijedeća opća akta:

- a) Pravilnik o radu,
- b) i druga opća akta predviđena zakonom.

XVI LICA OVLAŠTENA DA, PORED DIREKTORA, ZASTUPAJU INSTITUT, NJIHOVA OVLAŠTENJA I ODGOVORNOSTI

Član 34.

(Lice za zastupanje)

Direktor Instituta je lice ovlašteno da zastupa i predstavlja Institut prema trećim licima i odgovoran je za zakonitost i stručnost njenog rada u skladu sa zakonom, Odlukom i drugim važećim propisima.

Član 35.

(Punomoć)

- (1) Direktor Instituta u okviru svojih ovlaštenja može dati radniku Instituta ili drugom pravnom ili fizičkom licu pismenu punomoć za obavljanje određenih vrsta pravnih poslova (generalnu punomoć), odnosno za obavljanje pojedinih pravnih poslova (pojedinačnu punomoć).
- (2) Punomoć se izdaje na određeno ili neodređeno vrijeme.

Član 36.

(Ovlaštenje)

Direktor Instituta može pismenim putem ovlastiti drugog radnika da tokom njegovog odsustva potpisuje akte i dopise radi dostavljanja istih organima uprave i upravnim organizacijama, pravnim i fizičkim licima.

XVII NAČIN OSTVARIVANJA JAVNOSTI RADA

Član 37.

(Ostvarivanje međusobne saradnje)

- (1) U izvršavanju poslova i zadataka iz nadležnosti Instituta obezbjedit će se saradnja:
 - a) između organizacionih jedinica unutar Instituta a koja se odnosi na planiranje i programiranje odgojno-obrazovnih aktivnosti, izrada analiza, izvještaja, informacija i drugih stručnih i analitičkih materijala;
 - b) Instituta sa Ministarstvom za odgoj i obrazovanje Kantona Sarajevo, Ministarstvom za nauku, visoko obrazovanje i mlade Kantona Sarajevo i drugim kantonalnim organima uprave vezanih za unapređenje odgojno-obrazovnog rada;
 - c) Instituta sa gradskim i općinskim službama koje se odnose na jedinstvenu primjenu kantonalnih propisa za oblast obrazovanja;
 - d) Instituta sa federalnim organima uprave (Federalno ministarstvo obrazovanja i nauke, Agencija za standarde i ocjenjivanje) - recenziranje udžbenika, primjena propisa kojima se reguliše reforma obrazovanja, pripremanje zadataka objektivnog tipa, testiranje učenika te učešće u izradi analiza provedenog testiranja;
 - e) Instituta sa domaćim i stranim pravnim subjektima - saradnja se ostvaruje u izradi projekata koji se odnose na unapređenje odgojno-obrazovnog rada, reformu obrazovanja, obuku nastavnog osoblja.
- (2) Institut u međusobnoj saradnji sa drugim Zavodima, obrazovnim ustanovama i zainteresovanim organima i organizacijama, povremeno održava seminare, savjetovanja, simpozije, stručne aktivne, okrugle stolove u cilju razmjene mišljenja i stručnog usavršavanja prosvjetnih radnika.

Član 38.

(Javnost rada Instituta)

- (1) Rad Instituta je javan.
- (2) Javnost rada u Institutu se osigurava primjenom odgovarajućih propisa.
- (3) Načelo javnosti u radu ne može biti u suprotnosti interesima utvrđenim zakonom.
- (4) Direktor Instituta odlučuje kada će i u kojim slučajevima obavijestiti javnost o činjenicama i podacima sa kojima raspolaže Institut, a u skladu sa Zakonom o slobodi pristupa informacijama („Službene novine FBiH“, broj: 32/01 i 48/11) i Zakonom o zaštiti ličnih podataka („Službeni glasnik BiH“, broj: 49/06, 76/11 i 89/11).

Član 39.

(Obavještavanje radnika)

- (1) Radnici Instituta imaju pravo i dužnost da budu obavještavani o radu i izvršavanju odluka organa Instituta;
- (2) Obavještavanje radnika u smislu prethodnog stava dužni su osigurati direktor ili lice kome je povjerena dužnost informisanja radnika o određenim pitanjima.

XVIII OSTALE ODREDBE

Član 40.

(Pojedinačne odluke)

- (1) Sva pitanja koja nisu regulisana ovim Pravilima regulisat će se pojedinačnim odlukama Upravnog odbora.
- (2) Pojedinačne akte kojima se reguliše materija koja nije u nadležnosti Upravnog odbora Instituta donosi direktor Instituta.

Član 41.

(Upotreba muškog i ženskog roda)

Izrazi koji su radi preglednosti dati u jednom gramatičkom rodu u ovim Pravilima se bez diskriminacije odnose na muškarce i na žene.

Član 42.

(Izmjene i dopune Pravila)


Izmjene i dopune Pravila Instituta vršit će se na način i po postupku njihova donošenja.

Član 43.

(Stupanje na snagu Pravila)

Ova Pravila stupaju na snagu danom donošenja od strane Upravnog odbora Instituta a nakon prethodno pribavljene saglasnosti Ministarstva za odgoj i obrazovanje Kantona Sarajevo.

Broj: 30/22
Sarajevo, 16.03.2022. godine



v.d. predsjednika Upravnog odbora

Refik Šećibović